

D. it. / 33153

XXV / LEVI / 1



**VERSI IN DIALETTO**

**TRIESTINO**

**DI AUGUSTO LEVI**

**SECONDA EDIZIONE**



TRIESTE. 1915. — STAB. ART. TIP. G. CAPRIN

CS

—  
EDITORE L'AUTORE  
—



A

**CARLO SCHMIDL**

EDITORE INDEFESSO

CHE CON SAPIENTE INTELLETO

L'AFFLATO ANIMATORE

ALLA VITA MUSICALE TRIESTINA

INFONDEVA

ARRA DI STIMA

QUESTI VERSI

L'AUTORE

D. D.



# POESIE





## Quel baso

---

Quel baso me scota  
Me brusa la boca,  
E qua nele recie  
Go ancora la s'cioca.

De sveio, se dormo,  
Se parlo, se taso,  
Rosina mia bela.  
Mi sento quel baso.

O Dio che delizia!  
O Dio che profumo!  
No xe miga vero  
Che el baso xe un fumo!

No xe miga vero,  
La xe una busia,  
Che co una forbida  
El baso va via.

Dal giorno del baso  
Xe un mese passà;  
Me son ben forbido,  
Ma el baso xe qua.

Lo sento, lo gusto  
Con l'anima in gola,  
Lo go sula boca  
Tacà ch'el consola!

Quel baso xe un balsamo,  
Quel baso xe un fogo,  
Xe fiama, xe vampa,  
Xe incendio, xe rogo.

Quel baso xe vita,  
Xe luse, calor,  
Quel baso, Rosina,  
Xe palpito e amor.

El ziel me ga verto  
Quel baso improvviso,  
Compagna delizia  
No i ga in paradiso.

E se in tera un angiolo  
Svolassi per caso,  
Cambiarse in un omo  
Voria per quel baso.

Le anime nostre  
Sentindo la s' cioca,  
Xe corse de fuga  
A fior dela boca.

E senza far strepito  
Le se ga abracià  
E in una sol anima  
Uni le se ga.



## Abandonai

---

Co li sento sonar quei povareti  
Con tanta serietà, cussì intonai!  
Grizoli de passion nel cor me meti  
El pensier che i xe fioi abandonai.

Me par che quei concerti i sia bagnai  
De pianto e sospirar sento quei peti,  
Che no gavù careze e basi mai,  
Che no conossi de fameia afeti.

Guai se una bela e santa istituzion  
De quei fioi, quando i iera pulisini,  
No se gavessi mosso a compassion.

Cossa saria de lori? — A lavorar  
Pochi, la maggior parte a facuini,  
La preson saria andada a popolar.

## Parla el mulo Tunin

---

Mi per el studio no go zerto amori  
E no me importa de restar un mus,  
Al pandolo, ale lavre e se go bori  
In logo sconto un colpo de bancus.

Me la blangio saltar per le batele,  
Far dispeti ala gente, tirar scoi,  
Andar sonar de sera campanele,  
In trapola ciapar i pagnaroi.

D' istà, discalzo corer per la strada,  
Ale done del pan becar la biga,  
De quando in quando far una nudada  
Coi vestiti in mastela fin la diga.

Co capita le guardie, come mami  
Le resta nel veder sta furberia,  
— Ciò mulo! ma va là, lasso che i ciami,  
Svelto come un dolfin ghe filo via!

Co vegno in tera po, sbati sior Ana  
Che magnaria, ve giuro mi, per trenta,  
E magno come un lupo; xe una mana  
Quei fasioi, quele fete de polenta.

Xe un truco co mia mare la me manda  
A far spesa in botega magnativa:  
Fa presto, sa Tunin, la racomanda,  
E mi, come un gardel ciapo la briva.

La fiasca de oio scondo drio el porton,  
E coi bori che go vado a zogar,  
Co torno a casa ciapo un scopazon,  
Pianzo e me fazo prestò perdonar.

Ti finirà in preson, mostro de mulo!  
La va zigando da matina a sera,  
Mi rido, per un poco fazo el bulo;  
Po penso che la disi cossa vera.

Ma no go colpa mi, no go papà,  
Mia mama per le case fa servizi,  
Son sempre solo, sempre abandonà,  
E no go colpa mi se go sti vizi.

. . . . .

Ma più dolor no voio darte, mama,  
Vien, dame un baso, fame sto piazer,  
Sento l'afeto che per ti me infiamo,  
Metime mama, dai, far un mestier.

---

## Tombola

---

Per la fameia no ghe diol la testa,  
Zogar tombola xe la sua passion,  
E no ghe servi se el mari la pesta  
Zigando che la fia va torsiolon,

Sia giorno de lavor o sia de festa  
Co finì de magnar xe quel bocon,  
Ma gnanca se i la liga no la resta,  
No ghe xe per quel vizio remission.

— Sessantaquattro, vintidò, disdoto!  
— Le gambe dele done, i s'ciavi in piè,  
E la fia la xe atorno col merloto.

Sete! Nove!... Zinquina!... Ecola qua!..  
E la fia che col merlo fora xe,  
Giusto in quel punto tombola la fa.

---

## El portonier

---

Chi più felice xe del portonier,  
Lu nela vita no ga zerti guai,  
No ghe manca per beber el bicer,  
E in quanto a afito nol lo paga mai.

Poco el lavora anca se el ga un mestier,  
Ma de una cossa a lu' ghe importa assai:  
De leger quando capita el postier  
Le cartoline dei afituai.

Lu con gran poligana e muso roto  
Ale serve ghe cava i passerini,  
Tra la spuza de pipa nel casoto.

Lu conossi i segreti dela vita  
A menadeo de tuti i sui inquilini,  
Dal primo pian insina la sufita.

## Se presenta una serva

---

— Bon iorno, scusi, me ga dito dona  
De butiro che qua una serva ocori  
— Sentimo fia, de cossa ti xe bona?  
— De tuto, mi sa far tuti lavori,  
Mi fa camere, mi sà cusinar,  
Roba piccola mi sa sopressar.

— Benon, e quanto ti pretendi al mese?  
— Dese fiorini.

— Dai, no ghe xe mal;  
Dime franco, ti ga altre pretese?  
Ti ga el moroso?

— Si, ga caporal  
A, xe meio mi disi verità,  
Ce me vol cussì, ben, ce no mi va!

-- No digo niente, mi, go assai piazer  
E me piasi sta tua sincerità,  
Quando che ti ga fato el tuo dover  
Godite in santa pase el tuo soldà.  
— Grazie. Me diga sai camere xe?  
— Tre sul davanti e sul de drio altre tre.

- Orpo, xe alora sai grando quartier...  
— Con tuto ciò semo un poco ristreti.  
— E desso ancora mi vorria saver  
Se ga fioi pici, po, se ga palcheti?  
— Go fioi pici, palcheti e go altro ancora  
Ma ti ciapa la porta e va in malora.

## La baba

---

Tuto el giorno la brontola, per ela  
No va ben niente, tuto xe mal fato,  
La ghe taroca sempre a la putela,  
Guai se un momento la careza el gato.

La serva, disgraziada, no fa tela,  
La devi lavorar proprio a contrato,  
Vien zo la casa, vien, orca mastela!  
Se per fatalità la rompi un piato.

Tuto devi esser lusto come un specio,  
E se me intrigo mi, zito! la ziga,  
Protetor dele serve, bruto vecio!

Pensa ai tui fati, qua son mi parona! ..  
Ma in segreto bisogna che ve diga  
Che la xe in fondo una gran brava dona,

---



## La mia putela

---

La xe de rosa el bocolo  
Più bel che spunta in magio,  
La xe del ciel un angelo  
Che fa in sto mondo un viaggio.

La ga oci neri a mandola,  
Che lusi come el sol;  
E co la ridi, cocola,  
La par un rosignol.

Una testa de bucoli  
Con sprazi de rubin,  
Ghe fa cornise al palido  
Sentimental visin.

In campagna, scambiandola  
Per fior, a sbater le ale  
Su quei cavei de porpora  
Se posa le farfale.

De ela figurarselo  
Se son inamorà!  
E ela, carezandome  
La me ciama papà.

Si, benedeto angiolo  
Si amor, si vita mia...  
No stemo far malizie,  
Ve parlo de mia fia.

---

## El mio putel

---

Benedeto putel, ogni matina  
Ale zingue el se meti el sveiarin,  
E fin le sete e meza el te mulina  
Senza stancarse mai, grego e latin.

Po el va al ginasio; nol ga un gran talento  
Ma el ga amor proprio e volontà de fero,  
Ghe voio ben per questo e son contento  
E, no lo nego, de quel fio mi spero.

Studia, studia bambin, sempre ghe digo,  
Che el pan no manca a chi che ga studià,  
Se no, te parlo ciaro, xe caligo,  
Guai se te resti un mus come papà.

Mia moglie allora: — Dio, quel povareto  
Ti lo tormenti de matina a sera,  
No ti vedi che el studia, benedeto!  
El me par magro, palido de cera.

Mi rido e ghe ripeto al mio putel:  
Studia, e tua mama lassa che la canti,  
Più sal che ti te meti nel zervel,  
Più a sto mondo, fio mio, ti andará avanti.

El putel studia assai, mi ve assicuro  
Che pochi fioi ga tanta volontà,  
Solo el tedesco ghe xe un osso duro,  
E lo confesso proprio nol ghe va.

E xe davvero un dispiazer per mi,  
Se dopo tanto romperse la zuca,  
Qualche volta el me vien tuto avili  
Perchè in tedesco el ga ciapà una cluca.

---

## San Giusto

---

Xe secoli passai, ma cara e bela  
Dileta ciesa ti xe sempre là,  
Amor, speranza, luminosa stela  
Che indora coi sui raggi la cità.

I archi, i simulacri a noi ne svela  
Chi forte, immortal vita te ga dà;  
Nè tempo, nè nemizi no cancela  
El nasser tuo, la tua italianità.

Quando sona a distesa el campanon,  
E el prete dal altar stendi le man  
Dando ai devoti la benedizion.

Le imagini dei santi ga un sorriso,  
Perchè, no ghe xe dubio, l'italian  
Xe la lingua che i parla in paradiso.

---

## Una dele tante serve

---

Mi go una serva tuta scrofolada  
Che d'esser credi una gran bela mora,  
Co a far spesa la va con la signora  
A tuti quanti la ghe dà l'ociada.

Pronte scuse la ga per andar fora,  
La sua passion xe remenarse in strada,  
A sentirla, ela tuti la inamora,  
E chi la guarda peta la ridada.

Per andar a balar, po la xe mata  
De Modugno la va spesso a studiar,  
E la se magna tuta la mesata.

De far salti la trova sempre el drito,  
Se l'orbo vien in corte a strimpelar,  
La bala, e che se brusi el rosto o el frito!

---

## Progresso

---

La va pel Corso al' ora del liston,  
Vestida che la guarda tuti quanti,  
Ghe lusi nele recje do brillanti  
Che vien voia de darghe un morsigon.

I dixi che la xe poco de bon,  
Che la ga avù come formighe amanti,  
Pur la xe bela ancora e spasimanti,  
La ga che ghe se buta in zenocion.

Ma in ogi la xe onesta; la ga un vecio  
Che ghe ne dà cole man e coi piè,  
E de morosi no la ga che el specio.

Pensar che adesso al mondo la ga tuto,  
E un giorno, fioi bisogna che savè,  
La magnava la boba in Istituto.

---

## A Giuseppe Caprin

---

Mi te bato le man, te sufio soto,  
Te xe sta nanca bravo, orca mastela,  
De svodarghe del premio el scudeloto,  
Grazie al' opera tua nobile e bela!

Zerto a Mamon ti no ti xe devoto,  
Ma se i vien ti impinissi la scarsela,  
E sicome el tuo nome no xe ignoto  
El lauro ti ghe lassi a la padela.

Bravo Caprin, xe un premio merità,  
E più de qualchidun d' invidia cica,  
E invelenarte te voria col fià.

Mi invece godo de sta tua vitoria,  
E speto che ti mandi qualche flica,  
Per beber al tuo nome e ala tua gloria.\*)

---

\*) L'insigne amico mi mandò tosto 18 centesimi — che io trattenni — accompagnati dal seguente bigliettino: «Al peloso triestino, per un quarto di trentasei.»



## Vedova

---

Che dolor, che dolor! Che disgraziada!  
No la se pol calmar, la fa pietà!  
La pianzi come mata, desperada,  
El mari ghe xe morto un' ora fa.

Giovine ancora, vedova restada  
Sola in sto mondo cossa la farà?  
De lui la iera proprio inamorada,  
Tuta la vita la lo pianzerà.

— Via, la se calmi, dai, iera destin...  
La conforta cussì una vedovela  
Vistida in luto ultimo figurin.

— Calma? mai più! sempre sarò in sto stato...  
E guardando l'amica: ma che bela!  
Sto vestito che sarta ghe ga fato?

---

## Fortunà

---

O che omo xe quel, che posizion,  
E in pochi ani in alto el xe svolà,  
Che bravura fioi mii! quasi al milion  
Proprio in un bater d'ocio el xe arivà.

Cossa vol dir studiar, aver sgobà  
Sui libri giorno e note con passion!...  
Corone a ufa, amor, felicità,  
E in conto dela publica opinion.

Cariche citadine, gloria, onori,  
Seben de sta Trieste nol sia fio  
Citadin lo ga fato i sui gran bori.

Ma se in pupa no sufia la fortuna  
Ti te pol esser bravo come Dio,  
Che no ti ghe ne imbrochi nanca una.

---

## Per un gran sepolcro

---

Finora nanca un strazo de lumin  
Sul gran sepolcro, iera tuto scuro;  
Seben che prima e adesso ve assicuro  
Fazeva e fa gran ciaro quel divin.

Delito quel de lesa maestà,  
Che bisognava presto riparar,  
Due sorele latine ga pensà  
El sepolcro imortal de iluminar.

*Giglio* e *Alabarda* se ga dà parola  
A quel nobile impegno de far fronte;  
Una lampada artistica e un' ampola  
Per versar l' oio xe stà presto pronte.

Dixi el *Giglio*: quà dormi el creator  
De la lingua più bela de la tera.  
E l'*Alabarda* tuta fogo e ardor:  
Per difenderla son pronta ala guera

E disi ancora el *Giglio*: la fiamela  
Son che arderà sul gran sepolcro eterna.  
E l'*Alabarda* allora: E mi son quela  
Che con l'anima ardente la governa.

E nela note quando tuto tasi,  
Se alzarà dal sepolcro ombra adorata,  
*Giglio* e *Alabarda* impinirà de basi,  
Po tornerà a dormir tuta beata!

## Poveri veceti

---

Do poveri veceti

No i voleva più al mondo tribolar,

E abraciai streti streti

I se xe andai negar.

Iera do onesti, boni

Come el pan, i sgobava

Tuto el giorno e i campava

Se non da signoroni,

Cussì, i se la passava

Ala meo, e ogni aneto

A furia de lavor e economia,

I fazeva el viageto,

Ma no i butava via.

Un giorno — bruto giorno, —

Ga scominzià el lavor a scarsegiar;

I veci se ga dà le man atorno

Per poder rimediari;

Ma, o Dio, la sartoria

Iera de stampo antico come lori,

E a poco, a poco, a poco xe andai via

Quasi tuti i lavori.



Garzone e lavorante  
Dala matina a sera,  
Iera spesso debando,  
De sabato la paga tuta intiera  
De quando in quando  
Mancava, e i do veceti  
Impegnava, impegnava  
Fin i linziol dei leti.  
Ma tuto inutilmente,  
No tornava el lavor,  
E licenziar la gente  
Poveri, i ga dovesto con dolor.

Iera una bela sera,  
Un bel ciaro de luna, un ciel brillante  
De milioni de stele;  
Cantava primavera  
Le sue strofe più bele  
De amor el gran mistero  
Nel peto de ogni amante,  
E in cor dei do veceti  
Colpidi da la sorte,  
Come diamante nero,  
Brilava la salveza nela morte.

De più de un'ora a tavola sentai  
No i fazeva parola.  
Avilidi cussì no i iera mai,  
El pianto ghe fazeva gropo in gola.  
Nudava i oci in lagrime, dal cor  
I sospiri vigniva suso come  
El rantolo de chi sta per morir.  
Che strazio, che dolor  
Che no ga nome!  
Meio, meio finir!



— Meio, meio morir, no xe altro scampo  
No la xe vita questa!...  
Disi el veceto alfin, e come un lampo  
L'istessa idea balena de ela in testa.  
Tuti frementi dala comozion  
I se alza, i se guarda fisso in viso  
E in un slancio de amor e de passion  
I se abbraccia, i se basa...  
Fata una volta la risoluzion  
I se vesti, i va fora, i sera casa.

I va, i va, i va, streti a brazeto,  
Come do sposi che va far l'amor;  
I par contenti, i par, ma dentro in peto  
Incalza la tragedia del dolor.  
Xe el ciel tuto stelà, la luna viagia, —  
Susura el mar che rompi sula spiaggia  
E par che cento vose  
Lontane, misteriose,  
Con cupa melodia  
Canti dei do veceti l'agonia.

I va, i va, i va! — Ecoli in mar,  
L'aqua i piedi ghe bagna..  
I se ferma.. El veceto vol basar  
L'ultima volta la cara compagna..  
E avanti, avanti, avanti..  
Xe una note de amanti.  
Dei due veceti el cor palpita forte,  
Splendi la luna che ghe bati in viso,  
I fa l'amor adesso cola morte..  
Dopo i farà l'amor in paradiso.

I va, i va, i va — za fin al peto  
Xe l'aqua... fin al colo...  
Un baso ancora, povero veceto,  
Un baso, un baso solo...  
L'aqua se sera su due teste bianche,  
Su quele anime stanche  
Che no ga avù fortuna...  
E tramonta la luna.

---



## Siora Nani e siora Maria

---

No xe vero che fioi xe Providenza;  
Ghe digo mi, el proverbio xe sbaglià,  
Beati quei che in sto mondo xe senza,  
Un poco de lavor e un pan i ga.

Mi voria che se perdi la semenza!  
Solo miseria e lagrime i ne dà!  
Dio me perdoni! I xe la penitenza  
Del matrimonio per el gran pecà.

E se xe morto in fasse el suo putel,  
Un disgrazià de mèno xe a sto mondo,  
E un angioleto xe svolado in ciel

I fioi xe un lusso, che li fazzi i siori,  
Bestemierò, ma la me credi, in fondo,  
Xe de pianzer co i nassi, no co i mori.

---

## Fato de Cronaca

---

Fra la vita e la morte la lotava,  
I xe corsi a ciamar el professor,  
E intanto, come bisss, dal dolor  
La se storzeva in leto e la zigava.  
Xe capità el dotor,  
Con un ociada,  
El ga capì che quela povereta  
Iera una dona andata.  
In un lampo coi feri el ga cavà  
Una bela creatura sana e forte  
De do vite, strapando una ala morte.

Le amiche che aspetava zo in porton  
Per parlar col dotor, co ga senti  
Che el povaro mari  
Urlava de passion,  
Xe corse tute in camera e vedendo  
Quela morta, quel omo disperà  
Che sustava piansendo.  
Le xe restade tute senza fià  
Con un gran gropo in gola,  
Che passar no lassava una parola.

Sul stesso leto della morta, intanto  
La comare infassava la putela,  
Che la gente che sgoba no ga tanto  
De sostegnir la spesa  
Per comprarse do leti,  
E in un de una persona e mesa  
I dormi e i xe contenti, povereti.

Co ga visto el dottor  
Che stava andando via,  
Quelle done fermade sula porta,  
Che fissava con ocio de dolor  
Quela povera morta,  
El ga dito: da brave, una de cor  
Per quela creatura!  
Se el papà va al lavor  
Che qualchiduna de ela gabi cura.

La ciogo mi! xe sta una vose sola,  
Ma una, la più giovine: — andè là,  
Per darghe la fiascheta e te de viola!  
Grazie a Dio son mi qua  
Per darghe late bon — son forte e stagna  
Zinque e uno sie! Sarà una gran cucagna.

Dir e ciaparse in brazo la putela  
Tuto un lampo xe sta. —  
A quel azion de amor nobile e bela,  
El povero papà  
Tuto tremante dala comozion  
Le man el ga basà  
De quela dona,  
Con tanta devozion  
Come se fossi stada la Madona

Con questo, la putela  
Nel suo fazoleton involtizada,  
La se ga ciolto in brazo e filà via;  
A casa sua arivada,  
La ga da presto late prima a quella  
Dopo ala propria fia;  
Po sazie tute do  
La le ga messe zo.  
E nela stessa cuna i do viseti  
Dormiva che pareva do angioleti.

Straco de aver sgobà,  
Iera le sie, el marì  
Capita a casa. Tuti i fioi in coro:  
Papà scoltime mi, scoltime mi,  
Mama ne ga comprà  
Una nova sorela,  
Un angelo, un tesoro.  
Tanto, ma tanto bela.

-- Ciò, i fioi diventa mati! disi lu  
La moglie ridi che no la pol più.  
El marì guarda in cuna,  
El vedi do putele invese de una.—  
— Che nova, ti diventi anca ti mata,  
De chi xe st'altra fia?

— Oramai, la xe fata,  
Disi calma la mogile: — La xe mia!  
E qua in poche parole  
La ghe spiega la storia tal e qual,  
Lu alfin comosso: — Za col te de viole  
I ghe fazeva presto el funeral.—  
Ma ti te gaverà late abbastanza?

— Per questo vecio mio, no aver pensier  
Go late in abundanza

E po sta bona azion me fa piazer.

— No baba mia, no voio aver passion

De vederte smagrir,

Mi te voio nutrir,

Voio vederte bela come un fior.—

Pregarò el mio paron

Che me fazi far „quarti“

Dopo finì l'orario de lavor,

E qualche bira voio che ti bevi

Per far do buli arlevi.

La bira fa assai late,

Te par poco dover nutrir do tate?

E qua, guardando in cuna la putela :

— Mostra de mula, la xe nanca bela !

Se vedi che no xe nostra semenza

Zinque e una sie, za fioi, xe providenza!

---

Le "canzonette" sono stampate con autorizzazione della  
"Gazzetta" da Riccardo & C. di Milano, e C. Schmidt & C.  
di Torino. La relativa musica è in vendita presso lo Sta-  
bilimento musicale C. Schmidt & C. Torino.

---



# CANZONETTE

---

Le canzonette musicate, sono stampate con autorizzazione delle Case editrici G. Ricordi & C. di Milano, e C. Schmidl & C. di Trieste. — La relativa musica è in vendita presso lo Stabilimento Musicale C. Schmidl & C. Trieste. =====

---







## Avemaria

---

Vien qua mora, mi te adoro  
Sol per ti me bati el cor,  
Ti ti sa mio bel tesoro,  
Che xe un gusto far l'amor.

E quando sona l'Avemaria,  
Mi sula boca te baserò,  
Che sempre, sempre ti sarà mia  
Al cor strenzendote te giurerò.

No te vestirò de raso,  
Ma mia sposa te farò  
E compagni al primo baso,  
Tuti quanti te darò.

E quando sona l'Avemaria, ecc.

El mio vero amor aceta,  
E no stame far morir,  
De sì disi benedeta  
Che comincia za a imbrunir.

E quando sona l'Avemaria, ecc.

Scolta, dai la mia preghiera.  
Mi te condurò al altar,  
La campana dela sera,  
Incomincia za a sonar.

E quando sona l'Avemaria, ecc.

---

Musica dei M.i G. Gianfrè e Michelangelo

## El bel tenor

---

Quel nome fa miracoli  
Tute le mule ciamà,  
Le cori come fulmini  
Suso al Politeama,  
E quando vien in scena  
E canta el bel tenor,  
Le gongola, le spasima,  
Ghe sbisiga nel cor.

Vardelo che cocolo  
Col canta e col tasi,  
Che oci, che boca,  
Che boca de basi!  
Che vose, che denti!  
Che spale che el ga!  
Restar inocenti  
Xe proprio un pecà!

Che sia la Tosca o Carmen,  
Traviata, opur Fedora,  
Quel benedeto giovine  
L'incanta, l'innamora;

Pute, sposade, vedove,  
Se senti un gran calor  
E le va tute in estasi  
Co canta el bel tenor

Vardelo che cocolo, ecc.

Quel fogo lu smorzarlo  
Voria con gran piazer!  
Magari! xe impossibile,  
Nato nol xe pompier.  
Caveve dunque i grizoli,  
Andar no ste in furor,  
Mule contentè l'ocio,  
Guardando el bel tenor.

Vardelo che cocolo, ecc.

---

Musica del maestro M. Chiesa.

## El campanil de S. Giusto

---

El guarda za da secoli  
La sua Trieste bela,  
Da tempo inemorabile  
El fa da sentinela;  
Che sufi vento e bora,  
Paura no ghe fa,  
La vista sua inamora:  
Xe l'italianità!

Che orchestra, fioi, che musica  
Co sona le campane!  
Quele ga vose umane,  
Quele ne parla al cor!  
El ne consola l'anima  
Quel campanil vetusto,  
La gloria de San Giusto  
El santo protetor!

Soto de lu 'l gran tempio,  
Ghe ga inalzà i latini,  
Amor, speranza, orgoglio,  
De tuti i triestini;

La ciesa che ne guarda,  
Quel eterno gioiel:  
De Sergio l'alabarda  
Cascada zo del ziel.

Che orchestra, fioi, ecc.

O campanon, dai sonine,  
Còn vigorosa scossa,  
O campanil inalbera  
La tua bandiera rossa;  
Din... dan... finchè ne toca  
El cor el tuo din-dan,  
Se sentirà ogni boca  
Parlar in italian.

Che orchestra, fioi, ecc.

## Sessolote...

---

Semo fresche, semo bele  
E sul viso mai sbeleto  
Bianca e rossa xe la pele,  
Tanto in strada come in leto,  
Carneval xe el nostro covo  
Su in casson e al Porto novo.

No andemo miga in maschera .  
Come le capeline,  
Che sti museti, diavolo !  
Xe rose, senza spine,  
Vardeli... sangue e late !...  
E d'una polca al son.  
Noi sole semo l'anima,  
Del celebre casson.

Ma de carneval sgobemo  
Per la sala e la polenta,  
E drioman caffè netemo,  
La fadiga no spaventa:  
De natura forte e stagna  
Se se sgoba, se guadagna.

No andemo miga in maschera, ecc.

E finì el lavor la sera  
Coss' credè che semo fiapè?  
Ma va là! su per Barriera,  
Noi vignimo in tante clape,  
La canzon petemo in coro  
Viva el nostro biondo o moro!

No andemo miga in maschera, ecc.

---

Musica del maestro Michelangelo.



## Casson xe Bonbon!

---

Nina, mi solo scoltime  
Spalanca ben la recia,  
E serila ale prediche  
Che te farà la vecia,  
Co ela iera giovine  
Te credi forse ti  
Che in carneval in maschera  
No la s'à diverti?

Lassù al Politeama  
Andemose a blangiar,  
A costo che tu mama  
Te gabi de refar...  
Ah! Ah! Ghe disi el popolo  
Andemo su in casson,  
Casson?... va ben, ciamemolo,  
Ma invezze el xe un bonbon.

Rifilime un garofolo  
Se mi te toco un deo,  
E se la vecia brontola  
Ti faghe maraméo;

Za el cor me salta e sbisiga  
Co penso de balar...  
Dai, negra mia, distrighite  
No stame far rabiari!

Lassù al Politeama, ecc.

Voio saltar, blangiarmela  
I corni farghe al leto,  
E in qualche polca celere  
Petarte un bel baseto,  
E la matina in cinberli  
Darghe un'adio al casson,  
E, che lavori l'orso,  
Par mi vado a paion.

Lassù al Politeama, ecc.

---

Musica del maestro M. Chiesa.

## Bosco dei Pini

Pochi conossi quella contrada  
Che porta el nome de un caro fior,  
E del Boscheto pur sula strada  
Brila quel nome che xe un splendor

Dai, mula, vien, sta zita  
Basta che te camini,  
Contrada Margherita  
E po Bosco dei Pini,  
Pensa che nome caro  
Che proprio dixi amor,  
Come che el parla ciaro  
Come el consola el cor.

Camina svelta, senti el frescheto  
Spunta la sera, tramonta el sol,  
Ciapite streta, streta a brazeto,  
Fra i rami canta za el rosignol.

Dai, mula, vien, ecc.

Finì la riva, pochi scalini,  
Ne invita el verde, viver e amar,  
Sentarse andemo soto a quei pini  
Un'incantevoto ora a passar.

Dai, mula, vien, ecc.

Musica del maestro M. Ballini

## Barcarola

---

Xe presto note -- note serena  
Spunta la luna -- la luna piena,  
Varda le stele -- par de brillanti  
Coi raggi de oro -- le parla al cor.  
Note de amanti -- note de amor

Careze e palpiti  
Ga el mar stasera,  
Par che sia musica  
Ala riviera,  
Senti sta arieta  
Consola el cor,  
Nela barcheta,  
Vien far l'amor.

In mezo le onde -- se godaremo,  
E dondolandose -- l'amor faremo,  
Po a fondo l'ancora -- boca' con boca,  
Solo de basi -- vivi l'amor  
E s'cioca, s'cioca -- Che i vien dal cor.

Careze e palpiti, ecc.

In ciel, tesoro — brila le stele,  
Le inamorate — xe le più bele,  
Co ti me basi — come una stela  
Credime bionda — ti ga el splendor,  
Perchè più bela — te fa l'amor.

Careze e palpiti, ecc.

Musica del maestro Arturo Carisi.

## El castel de la colonia americana

---

Nela zeleb্রে contrada  
Xe inalzado un gran castel,  
Co passè per via Crosada  
Feghe tanto de capel,  
Pur là dentro no se scana,  
No 'l xe un feudo medioeval  
La colonia americana  
Scola là più d'un feral,  
E co vien l'ora brusada  
I ghe peta la cantada.

Semos Americanos,  
Venidos de la gran ciudad,  
Por exaltar la gloria  
Del celebre Colombo.

Xe el castel e la bandiera,  
E un bel toco de canon,  
Ma no miga par far guera  
Che el canon xe de carton,  
E le bale i americani  
No i le vol nanca de vin,  
E per questo forti, sani

Sempre pieni de morbin,  
Quando vien l'ora brusada  
I ghe peta la cantada.

Somos americanos, ecc.

Ma no i vien del mondo novo  
Tuti quanti i xe europei,  
E nel classico ritrovo,  
Più che amizi i xe fradei,  
Se el canon no ghe bombarda  
E el castel no fa teror,  
Pur un santo e l'Alabarda  
I ga sempre in mezo al cor,  
E co vien l'ora brusada  
I ghe peta la cantada.

Somos americanos, ecc.

Musica del maestro Tergestino

## Basemose!...

---

Rosina mia basemose,  
No sta impirar el muso,  
Basemose, basemose,  
Che baso no fa buso,  
Ma l'espression più pura  
Xe el baso de l'amor,  
Per ti sol sta sicura,  
Mula, me bati el cor.

(*Suono di baci*) Um! Um! senti che musica,  
Che gusto xe basarse,  
No stemo dai lassarse,  
Go el cor che xe un vulcan,  
Um! Um! O che delizia!  
Basemose drioman.

Se basa in ciel i angeli,  
E in tera i bei fioleti,  
Co i fa ci-ciu sul albero,  
Se basa i useleti,  
Amor xe un solo canto,  
Tuti se vol basar;  
El baso suga el pianto,  
El cor fa consolar!

Um! Um! ecc.



Rosina mia basemose,  
Ma dopo una gran zena,  
Risoto, dindio, bibita.  
Che sia la panza piena,  
A far l'amor mi godo,  
Ma xe pur bel magnar,  
Rosina, saco svodo  
In piè no pol mai star.

Um! Um! ecc.

---

Musica del maestro Arturo Carisi.

## Doman xe za quaresima

---

Mula te vien, me sbisiga  
El corisin in sen,  
Ala, al veglion smachemose.  
Che el tacuin xe pien,  
Cola calada e el pindolo,  
In bala su in casson,  
Camina, negra, in mascara,  
Xe l'ultimo veglion.

Doman xe za quaresima,  
Magro doman se magna,  
Camina, dai, godemola  
Sta ultima cucagna,  
Doman, fia mia, le zeneri  
Ricorda esser mortal,  
E a San Giovanni el popolo  
El brusa Carneval.

Sonà xe za le undise  
No sta chilarte, dai,  
Pensa le „danze fervono“,  
Cussì dixi i giornai,

Meti un linziol sull'abito  
Su, fame sto piazer,  
Che mi in tun bater d'ocio  
Me vesto de guargier.

Doman xe za quaresima, ecc.

E finchè semo giovini  
E che ne spiza i piedi,  
Moreta mia blangemose,  
Mi balo za, te vedi,  
In leto che se cocoli  
I veci e i disperai,  
Mula go el taco carigo  
Come no go vu mai.

Doman xe za quaresima, ecc.

---

Musica del maestro Bruno Guisa.

## Mola el lavor

---

Dan dan! — Bati le oto,  
Mola el lavor e vien.  
Varda che bela sera,  
Varda che ciel seren.  
Dan dan! Bati l'orloio,  
E fa tic-tac el cor,  
Fa presto mio tesoro,  
Andemo far l'amor.

Camina, camina,  
Andemo al avertò  
Al bosco dei pini  
Xe tuto un concerto;  
Camina, camina,  
Fa el grilo cri-cri!  
E un grilo che canta  
Go in testa anca mi.

L'orloio co se ferma  
Se torna carigar,  
Ma el tempo no se cariga,  
Nè se lo pol fermar.  
E finchè amor ne scalda

Godemo a far l'amor;  
Xe oto, su distrighite,  
Vien via, mola el lavor.

Camina, camina, ecc.

Fiorissi primavera,  
El bosco xe un splendor,  
In mezzo al bosco e al verde,  
Ti pararà un gran fior.  
Vien! Xe la vita un lampo,  
Svola la gioventù,  
Co se diventa veci  
L'amor ne fa cucù!

Camina, camina, ecc.

---

Musica del maestro M. Chiesa.

## Blangèmose alla Colonia Americana

---

Salve Colombo, ligure ardito  
Che il nuovo mondo festi palese,  
A questo nostro sacro convito  
Noi t'invochiamo gran genovese!  
Noi t'invochiam!

Qua semo una fameja  
Che no ghe diol la testa  
Nissun ne rompi i timpani,  
Qua semo sempre in festa.

Chi meti piè in America  
Trova la redenzion,  
El ridi, el se la blangia  
Meio che su in casson.

Ave! color vini clari!  
Ave! sapor sine pari!  
Nos vagabunduli, sumus jucunduli  
Sumus Cristiani, Americani!  
Per omnia pocula poculorum!  
Per omnia pocula poculorum!  
Amen!

Sto camarin xe classico,  
El val un gran tesoro,  
Qua ghe xe capi d'opera  
Che pur no costa un boro.

Lo pagaria i musei  
Co l'oro ne le man.  
El papa fin desidera  
De averlo in Vatican.

Ave! color vini clari! ecc.

Pitori, artisti zelebri,  
Scultori, leterati,  
El vin de Lissa i ciucia,  
Che par che proprio i lati

Mai no ghe xe una ciacola,  
Alegri, matarani,  
Xe le gran bele macie  
Sti nostri americani.

Ave! color vini clari! ecc.



---

D. 17. 33153

Musica del maestro Cav. Incognito.



Minutes of meeting of the Board of Directors